

# PROPOSISHON DI LEI AKOHIDA DI MUCHA HULANDA KARIBENSE

*Informashon  
pa akohida di  
muchu. Duna  
bo opinion!*



**BES(t) 4 KIDS**

## Proposishon di lei Akohida di mucha Hulanda Karibense

E programa BES(t) 4 kids kier ofresé, akohida di mucha bon, seif i pagabel pa tur mucha na Hulanda Karibense. E enfoke ta riba krea un ambiente seif i ku atenshon pa mucha ku ta aksesibel pa tur kas di famia, di manera ku kada mucha tin e oportunidat pa desaroyá su mes suficiente. Ta bai ankra e reglanan básiko pa sentronan di mucha i pa 'gastouder' na Hulanda Karibense den un lei. Promé ku e proposishon di lei bira definitivo, ta importante pa tende bo opinion. Den e foyeto akí bo ta lesa mas tokante e proposishon di lei, kua kambionan ta bin pa bo i kon bo por duna bo opinion tokante esei.

### Dikon e proposishon di lei akí?

Na e momentu akí ya tin un Ordenansa insular Akohida di mucha den kua hopi eksigensia di kalidat pa sentronan di mucha i pa 'gastouder' ta inkluí. Tin tambe kaba un areglo di subsidio temporal pa akohida di mucha, pa por mehorá e kalidat i baha gastu pa mayornan.

Den e proposishon di lei Akohida di mucha Hulanda Karibense, ta bai ankra e eksigensianan di kalidat duradero. Banda di esei e proposishon di lei ta regla finansiamentu struktural di akohida di mucha. E finansiamentu akí ta bin na lugá di e areglo di subsidio temporal, di manera ku huntu nos por sòru pa akohida di mucha bon, seif i pagabel.

### Kalidat

**Den e proposishon di lei tin diferente eksigensia di kalidat inkluí pa akohida di mucha.**

#### Pèrmit ta rekerí

Organisashonnan di akohida di mucha mester tin un pèrmit di eksplotashon. Entidat Públiko ta otorgá e pèrmit akí si e organisashon ta kumpli ku e eksigensianan di kalidat. E proposishon di lei no ta kambia esaki. Loke si ta kambia ta, ku akohida di parti di 'gastouder' por tuma lugá riba un isla, solamente si e Entidat Públiko permití esei.

#### E eksigensianan di kalidat ta keda na vigor

E eksigensianan di kalidat den e proposishon di lei ta koincidí pa gran parti ku e eksigensianan den e Ordenansa insular Akohida di Mucha. Intenshon di e eksigensianan di kalidat ta ku sentronan di mucha i 'gastouder' mester sòru pa akohé mucha den ambiente seif i plasentero i ku ta stimulá nan den nan desaroyo miéntras nan ta hunga. Ta bai por

ehèmpel pa eksigensianan pa grandura di grupo, espasionan paden i pafó i registrashon por eskrito di e maneho pedagógiko, di siguridat i di salubridat. E eksigensianan pa sentronan di mucha i 'gastouder' ta diferensia di bes en kuando.

#### Eksigensianan di kalidat nobo

E proposishon di lei ta kontené tambe un kantidat limitá di eksigensia nobo. Intenshon di e eksigensianan nobo ta ku muchanan na Hulanda Karibense por desaroyá nan mes bon kontinuamente i pa e transishon pa skol básiko ta kana fleksibel. Sentronan di mucha i 'gastouder' pa e motibu ei mester sigui desaroyo di muchanan, i mester hasi palabrashonnan entre akohida di mucha i e skolnan tokante kon ta hinka e transishon den otro. Banda di esei skolnan básiko ta obligá di ofresé un programa pa edukashon preskolar den grupo 1 i 2. E programa akí ta kontinuashon riba e programa pa edukashon pre-skolar ku akohida di mucha (0-4) ta ofresé.

## Supervishon

**E proposishon di lei ta regla ku Inspekshon di Enseñansa ta supervisá kalidat di e akohida di mucha. Ora di hasi supervishon, inspekshon ta kolaborá ku inspektornan lokal di e entidat públiko.**

### Inspekshon ta pasa anualmente

Inspektor(nan) lo bishitá organisashonnan di akohida di mucha kada aña. Esei por ta anunsiá òf inesperá. E inspektor no ta wak solamente si riba papel ta kumpli ku e lei, pero lo bai wak tambe den e gruponan. E inspektor ta hiba kombersashonnan ku direktiva i gerensia, kolaboradónan i tin bia ku mucha i mayor tambe. E inspektor ta diskutí e resultadonan ku e sentro di mucha òf mayor anfitrión. Ta pone e resultadonan den un rapòrt. Lo publiká e rapòrt, huntu ku reakshon di e organisashon riba e evaluashon di inspekshon.

### Enfasis ta riba supervishon ku ta duna estímulo

Inspekshon lo ehekutá partikularmente supervishon ku ta duna estímulo. Esei ta nifiká ku supervishon ta dirigí riba mehorashon di e kalidat di e akohida. Si inspekshon konstatá fayó serka un sentro di mucha òf mayor anfitrión, inspekshon e ora ei por duna enkargo pa drecha esaki den un periodo di tempu determiná. Si e sentro di mucha òf 'gastouder' no solushoná esaki na tempu òf si tin asunto di un situashon peligroso, e ora ei inspekshon por hasi uso di instrumentonan mas pisá, manera un but atministrativo.

Ta tuma tempu pa e sentronan di mucha i pa e 'gastouder' kumpli ku tur e eksigensianan di kalidat. E promé añanan inspekshon lo tene kuenta ku esei ora duna un enkargo di korekshon. Si ta trata di siguridat i salú di mucha, inspekshon ta aktua mas severo. Inspekshon lo tene kuenta ku deseo: lo wak ku kada organisashon, kiko ta e promé kos ku e organisashon mester traha riba dje.

## Finansiamentu

**Ku e programa BES(t) 4 kids nos kier garantisá ku tur mayor por manda nan yunan akohida sin ku nan tin ku preokupá nan mes tokante finansiamentu. Mayornan no ta obligá di hasi uso di akohida di mucha. Pero ta deseabel si pa muchanan bai akohida minimal un par di dia pa siman.**

### Mayornan ta paga kontribushon na Gobièrnu Sentral

Den e proposishon di lei Akohida di mucha Hulanda Karibense tin stipulá ku mayornan, meskos ku awor ta e kaso, ta hasi palabrashonnan ku e sentro di mucha òf ku e 'gastouder' tokante akohida di nan yu(nan). Mester pone e palabrashonnan ei den un kombenio por eskrito. E proposishon di lei ta stipulá ku mayornan ta paga e kontribushon di mayor na Gobièrnu Sentral na lugá di e sentro di mucha òf e 'gastouder'. Altura di e kontribushon di mayor, meskos ku awor ta e kaso, ta dependé di entrada di e mayornan.

### Gobièrnu Sentral ta paga e akohida di mucha

Den e proposishon di lei ta stipulá ku Gobièrnu Sentral ta ofresé un kompensashon den e gastunan di akohida di mucha na organisashonnan ku un pèrmit di eksplotashon. Kada organisashon di akohida di mucha por risibí un kompensashon stipulá pa kada mucha. E aña akí (2020) ta kuminsá un investigashon pa determiná kiko ta un kompensashon rasonabel pa kada mucha. Gobièrnu Sentral lo usa e resultadonan di e investigashon akí pa determiná altura di e kompensashon pa kada mucha.

### Reglanan pa sentronan di mucha i pa gastouder

Un sentro di mucha i 'gastouder' no mag pidi kontribushon adishonal di mayornan, tampoko un kontribushon boluntario. Pa muchanan pa kua no por pidi un kompensashon, sentronan di mucha i 'gastouder' por pidi un kontribushon di e mayornan si. E kontribushon ei no mag ta mas abou ku e kompensashon di Gobièrnu Sentral. Banda di esei sentronan di mucha i 'gastouder' no mag nenga mucha si no tin un lista di espera.

The page features several stylized human figures in pink, orange, and blue, scattered across the white background. A large pink figure is in the top left, an orange one in the top right, and a blue one in the middle right. Smaller figures of the same colors are in the bottom left and bottom right. A blue starburst shape contains text in the center. The bottom right corner has a pink and orange abstract graphic.

## Bo opinion tokante e proposishon di lei

Abo tambe ta laga nos sa kiko bo ta pensa di e proposishon di lei akí? Esei por te ku **31 di desèmber 2020** via [www.best4kids.nu](http://www.best4kids.nu), riba e página 'Regulashon Legal'. Akí bo ta haña tambe un kompilashon di e proposishon di lei.